

Mercredy 18 feurier.

Jean, filz de Bon Claude Menestrier de Marchampt (1), dict Viornery, fut prins en son lict par les sergents de Villefranche qui l'amenerent à Beaujeu, et aprez disner fut mené lié et garotté à Villefranche : Ion l'accusoit d'vng meurtre d'vng jeune homme qui nagueres auoit esté tué la nuict à Marchampt. Avec ledit Viornery fut prins et mené vng autre pailard nommé Puillat qu'on disoit auoir aydé à tuer le poure homme. Ce Viornery auoit esté lung de ceulx qui auoient tenu Morteault quand il fut occis par le bastard de Nagu (2) durant les troubles, et luy mesme auoit desrobé le cheual du preuost Thibault.

Dimanche 2 mars.

En ce temps le Roy assiegeoit troys villes, La Rochelle, Nymes et Sancerre, que les Huguenotz auoient occupées.

Jedy 2 auril.

Mon frere le chanoine partit pour aller à Lyon querre de la graine de saint-foin, et en ce voyage il me promit de donner charge à Gryphius de faire relier les liures (3) que ledit Gryphius doibt, assauoir 4 en veau rouge et dorez, et les autres 8 en parchemin blanz et dorez sur la tranche, et encores outre tous ceux là, nous prions Gryphius de faire relier encores quatre autres en parchemin aussi dorez.

(1) Commune du canton de Beaujeu.

(2) La famille de Nagu de Varennes possédait encore, au milieu du siècle dernier, le château de Varennes, qui subsiste toujours entre Quincié et Marchamp.

(3) De l'*Histoire de Lyon*, qui avait été achevée d'imprimer le 13 mars précédent. Ces exemplaires étaient destinés à être offerts par l'auteur, à ses protecteurs et à ses amis.